

18. GRENDELTYD WHATSAPP KINDERKERK LES:

Jakob werk vir Laban – Genesis 29:1-30

Jakob het uiteindelik naby Haran gekom. Daar was 'n put met 'n swaar klip op die opening. Drie troppe skape het geduldig daar gestaan en wag. Die skaapwagters het elke aand gewag tot al die troppe skape daar is, dan rol hulle die swaar klip weg. As die skape klaar gedrink het, het hulle die klip weer teruggerol.

Jakob het die skaapwagters vriendelik gegroet. "Van waar af kom julle?" het hy gevra. Hulle het geantwoord: "Van Haran af." "O, dan ken julle seker vir Laban. Hy kom uit die familie van Nahor." het Jakob gesê. Die skaapwagters het geantwoord: "Ons ken hom." Jakob vra: "En hoe gaan dit met hom?" Hulle antwoord: "Dit gaan goed. Kyk, daar kom sy dogter Ragel nou net aan met haar pa se skape." Jakob vra toe: "Nou hoekom is julle almal hier? Dis mos te vroeg om die skape in die kraal te jaag. Hoekom laat julle nie die skape water drink sodat hulle nog kan wei nie?" Die skaapwagters het geantwoord: "Jy verstaan nie hoe dit werk nie. Ons wag tot al die troppe skape uit die veld kom. Dan hoef ons die swaar klip net een keer weg te rol. Al die skape drink dan gelyktydig."

Terwyl hulle nog so staan en praat, kom Ragel daar aan met haar pa se skape. Jakob het dadelik vir haar die klip weggerol sodat die skape kon water drink. Hy het homself toe aan Ragel bekend gestel. Ragel het dadelik huis toe gehardloop en vir haar pa, Laban, gesê sy suster, Rebekka, se seun staan buite die stad by die put. Laban is dadelik soontoe. Jakob is saam met Laban huis toe.

Jakob het by Laban-hulle gebly. Na 'n maand het sy oom vir hom gesê: "Jy is nou al 'n maand hier. Jy werk selfs vir my. Al is ons familie, beteken dit darem nie jy moet verniet vir my werk nie! Hoe kan ek jou betaal vir die werk wat jy doen?" Laban het twee dogters gehad. Die oudste se naam was Lea. En Lea het dowwe oë gehad, maar die jonger sussie, Ragel, was pragtig. Jakob was verlief op Ragel. Hy sê toe: "Ek sal sewe jaar vir Oom werk as ek met Ragel mag trou." Laban het ingestem. Jakob het toe sewe jaar lank vir Laban gewerk. Dit het vir hom soos 'n paar dae gevoel, want hy was baie lief vir Ragel. Toe die sewe jaar verby was, het hy vir Laban gesê: "Die sewe jaar is verby. Nou wil ek met Ragel trou."

Laban het 'n groot bruilof gereël. Die aand na die troue het hy skelmpies sy oudste dogter, Lea, na Jakob se tent gestuur. Jakob was lekker vrolik en het nie eers besef Lea is gestuur nie. Die volgende oggend het hy dit eers besef. Hy was baie kwaad en het vir Laban gesê: "Hoekom het Oom my verkul? Ek het mos sewe jaar lank gewerk om met Ragel te trou!" Laban het geantwoord: "Jy verstaan nie ons gebruike nie. Hier by ons kan die jongste dogter nie voor die oudste een trou nie. Wag net 'n week, dan kan jy met Ragel ook trou. Maar dan moet jy nog sewe jaar vir my werk." Na die week verby is, het Jakob met Ragel getrou.

18. Jakob werk vir Laban – Genesis 29:1-30

Inleidende aktiwiteit: Beloftes vir die week:

Kry stukkies papier en skryf elke lid van die gesin se naam afsonderlik neer op die papiertjies. Elkeen kry nou 'n kans om 'n papiertjie te trek met 'n naam op. Moenie wys wie se naam jy getrek het nie. Gee nou so vyf minute kans vir elkeen om na die naam te kyk wat hulle getrek het en dan moet hulle een goeie daad op die papiertjie met die naam op neerskryf wat hulle belowe om vir daardie persoon gedurende die week te doen. Probeer dit so doen dat daardie persoon nie weet wie dit is wat die mooi ding vir hulle gedoen het nie. Julle kan met die volgende Bybelstudie oor 'n week vir mekaar vertel watter naam julle getrek het en wat julle vir daardie persoon gedoen het.

Vrae:

- Is dit belangrik om 'n belofte te hou?
- Hoe voel jy oor iemand wat nie hulle beloftes hou nie?
- Doen jy altyd wat jy sê jy gaan doen?

In die storie vandag lees ons van iemand wat gesê het hy sal iets doen, maar nie eerlik was nie.

Lees nou saam die Bybelstuk – Jakob werk vir Laban

Vrae:

1. Wat was die naam van die man by wie Jakob gaan bly het? (Laban)
2. Wat was Jakob se twee vroue se name? (Lea en Ragel)
3. Hoeveel jare het Jakob vir Laban gewerk voordat hy met Lea getrou het? (7 jaar.)
4. Hoe lank nadat hy met Lea getrou het, het Jakob met Ragel getrou? ('n Week.)
5. Vir wie was Jakob die liefste? (Ragel)
6. Wat dink julle van Laban en wat hy aan Jakob gedoen het deur hom eers met Lea te laat trou?

Aktiwiteit: Deel met mekaar verhale oor tye toe julle hard moes werk vir iets wat julle baie graag wou hê.

- Hoe het jy gevoel toe jy dit waarvoor jy so hard gewerk het, gekry het?

Gebedsgids:

- Vra God om jou te help om ander goed te behandel en eerlik te wees.